



## **Li regionali di lu 2008 e la banda di li trummati.**

**.Li urtimi elezioni regiunali / di lu dumila e ottu  
li candidati caniatinisi / ficiru tonfu cu lu bottu  
chiddri ca appizzavanu / manifesti cchiù abbunati  
arristaru cu na pezza nculu, / curnuti e vastuniati.**

**La cosa assai curiusa / ca eranu tutti accallanati  
facivanu la campagna / comu a li supermercati  
cu li offerti speciali / 50 euri ogni tri voti  
grana ca pi fallimentu / nun furunu cchiù dati.**

**Chistu era lu pattu / cu zingari e gintuzza scarsa  
usannu la pulitica / cchiù peggju di na farsa  
nun mi fazzu miraviglia / di cu si vinnì ppi fami  
ma di li galantuomini / ca fannu sti gesti nfami.**

**Li furstieri appiru successu / e quarchi furtunatu  
comu gaddrina “scaliava”/ ni li voti di lu cugnatu  
pi jiri a monticitoriu / bastava essiri numinatu  
accussì li voti attuccaru / a ccu l’avia ereditatu.**

**Lumardu ca nun è sceccu / ma spertu e nturciuniatu  
sapìa ca li listi d’appoggiu / avissiru fallutu  
ma sirvivanu sulu a purtari / acqua a lu so mulinu  
lassannu nmucca un uessu / a quarchi poviru mischinu.**

**Granni fiera battaglia / “Conquista di l’Autonomia”  
la stessa ca da sissant’anni / già sta Sicilia avìa  
iddri l’hannu guvirnatu / su sempri li stessi genti  
si cangianu e si stracangianu / cunfunniennu li menti.**

**Ci sunnu sempri li figliuezzi / di Gioia e Cianciminu  
s’ammuccianu darriè a don Sturzu / li niputi di Manninu  
cangianu banneru e partitu / po’ vontanu la foglia  
lassannu sta povera terra / nuda, cruda e spoglia.  
Caniattì Aprili 2008**

**Indice poesie: <http://www.solfano.it/treppiedi/index.html>**

**Pagina principale: <http://www.solfano.it>**